

ՀՀ Արագածոտնի մարզպետ Դավիթ Գևորգյանի ուղերձը Հայաստանի Հանրապետության Անկախության օրվա առթիվ

Սիրելի՛ հայրենակիցներ,

Շնորհավորում եմ Հայաստանի Հանրապետության Անկախության օրվա առթիվ:

Սեպտեմբերի 21-ը ևս մեկ առիթ է մեր պատմությանն առերեսվելու, տեսնելու, թե որտեղից ենք գալիս և հասկանալու, թե ուր ենք ուզում գնալ:

28 տարի առաջ հայ ժողովուրդը միասնաբար ու վճռական որոշեց անկախ պետականության հիմք դնել:

Նախորդ տարվա ապրիլ-մայիս ամիսներին հայ ազգը կրկին միավորվեց և մեկընդմիշտ ջնջելով անհնարինի սահմանները՝ ամրապնդեց 28-ամյա ձեռքբերումը: Իրականացված թավշյա, ոչ բռնի, ժողովրդական հեղափոխությունը անկախ Հայաստանի կյանքում նոր ու մաքուր էջ բացեց: Իրագործելով տարիների երազանքը՝ հայ ժողովուրդն իր առջև դրել է նպատակ, և բանվորից մինչև գիտնական, գործարարից մինչև պետական պաշտոնյա, ամեն մեկս մեր տեղում արդար աշխատանքով, անշեղորեն քայլելու ենք մեր երազանքների երկիրը տանող քարքարոտ, դժվարություններով լի ճանապարհով: Այդ ճանապարհին որպես առաջին քայլ մենք վերարժևորել ենք սովորող, պայքարող, աշխատող, ամեն օրվա հետ բարիք ու նոր արժեք ստեղծող մարդուն:

Այսօր արդեն Հայաստանն աշխարհին նորովի է ներկայանում: Հայաստանն ամեն փոխվող օրվա հետ դառնում է ավելի կայացած ու հզոր:

Այլևս երբեք հայն ու Հայաստանը, որպես ազգ ու որպես պետություն, գոյատևման, անկախության ձեռքբերման խնդրի առջև չեն կանգնելու, այլևս երբեք Հայաստանը չի՛ թալանվելու, նյութապես և բարոյապես չի՛ ոչնչացվելու:

Կեցցե՛ անկախությունը, կեցցե՛ աշխատող և իր ջանքով իր երազանքների երկիրը կերտող Հայաստանի Հանրապետության քաղաքացին, կեցցե՛ ազատ, անկախ, երջանիկ ու հզոր Հայաստանը:

Շնորհավորում եմ բոլորիս: